

Na jadenatsízásty oktober

Na reformaciski swěžen

BIBLISKI VOTUM – GRONO TYŽENJA

Drugi załožk njamóžo nicht položys, mimo togo položonego, kótaryž jo Jezus Kristus.

1. Korintarje 3, 11

EPISTOLA

we lisće Pawoła na Romarjow we 3. stawje

²¹ Něnto pak jo mimo pšicynjena kazni pšawdosć Boga zjawjona, wobznanjona wót kazni a profetow. ²² Ja pak powědam wo pšawdosći pšed Bogom, kótaraž pšizo pšez wěru na Jezom Krista k wšyknym a na wšyknym, ako wěrje. ²³ Pšeto tudy njejo žednogo rozdželenja: wóni su wšykne grěšyli, a brachujo jim ta chwalba Boga, ²⁴ a wóni budu dermo wupšawjone z jogo gnady pšez wumóženje, kótarež jo se stało we Kristum Jezusu. ²⁵ Togo jo Bog póstawil ako pokutu pšez wěru we jogo kšwi k wopokazanju swójeje pšawdosći, pšez wódawanje pjerwjejšnych grěchow we casu jogo sčerpnosći, ²⁶ aby wón we něntejšem casu wopokazał swóju pšawdosć a wupšawił togo, kótaryž jo z teje wěry we Jezusu.

²⁷ Žo wóstanjo něnto to chwalenje? Wóno jo wuzamknjone. Pšez kótaru kazń? Pšez kazń tych statkow? Ně, ale pšez tu kazń teje wěry. ²⁸ Toś mamy něnto za to, až cłowjek bužo wupšawjony pšez wěru mimo statkow teje kazni.

Romarje 3, 21–28

HALELUJA

Haleluja.

Pšeto Bog, ten KNĚZ, jo słyńco a ščit, ten KNĚZ dajo gnadu a cesć, wón njebužo tym bogabójaznym nic dobrego daś wubrachowaś. Haleluja.

Psalm 84, 12

EWANGELIUM

pla Matejusa we 5. stawje

¹ Ako pak Jezus ten lud wupyta, žěšo na góru a sednu se; a jogo wukniki pšistupichu. ² A wón wótwóri swóje wusta, wucašo jich a žašo: ³ "Zbóžne su te chude we duchu, pšeto jich jo to njebjaske kralejstwo. ⁴ Zbóžne su te, kenž žaluju, pšeto wóni budu troštowane. ⁵ Zbóžne su te miłosćiwe, pšeto wóni budu tu zemju derbnuś. ⁶ Zbóžne su te głodne a łacne za pšawdosću, pšeto wóni budu nasešone. ⁷ Zbóžne su te zmilne, pšeto wóni budu zmilnosć dostaś. ⁸ Zbóžne su, kenž su cysteje wutšoby, pšeto wóni budu Boga wižeś. ⁹ Zbóžne su te měrcynjarje, pšeto jim budu groniś Bóže žiši. ¹⁰ Zbóžne su te pšegónjowane teje pšawdosći dla, pšeto jich jo to njebjaske kralejstwo.

[¹¹ Zbóžne sćo, gaž was cłowjeki mójogo dla sromoše a pšegónjuju a gronje wšake zle pšesiwo wam, jo-lic z tym łdgaju. ¹² Wjaselšo se a juskajšo, pšeto wašo myto jo wjelike na njebju. Rowno tak su wóni pšegónjowali profetow, kenž pšed wami byli su."]

Matejus 5, 1–10 [11–12]

MÓDLITWA

1. Wšogomócnny, zmilny Bog, zdžarž nas we twójom słowje a pomogaj nam, aby jo pšawje wuznali, pó njom cerkwju a swójo žywjenje wobnowili a tebje cesćili we wěrje a lubosći, pšez našogo Kněza Jezom Kristusa, twójogo Syna, kenž jo z tobu a ze swětym Duchom žywy a se kněžy wót nimjernosći do nimjernosći. Amen.
2. Kněžo, naš Bog, pšez twójo słowo zdžaržyjoš a wježoš cerkwju. Pšosymy tebje: aby ju wobnowił, gaž se wót tebje zdalujo, a jej dał jadnotu we wěrje, pšez Jezom Kristusa, kótaremuž buži z tobu a ze swětym Duchom cesć až do nimjernosći. Amen.